

Naqqiut

Siunnersuut 16. 05. 2018-imeersoq taarserpaa

(Makku naqqiutigineqarput Inatsisip qulequtaa saqqummiussassallu qulequtaa)

Uunga siunnersuut: Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasaqaatit pillugit Inatsisartut inatsisaat nr. xx, xx. xxx 2018-imeersoq

Kapitali 1

Siunertaq aamma aaqqissuussaaneq

§ 1. Inatsisartut inatsisaanni Nuummi Ilulissanilu nunani tamalaani mittarfiit kiisalu Qaqortumi nunap immikkoortuani mittarfiup sananeqarnissaannut, aningaasalersorneqarnissaannut ingerlanneqarnissaannullu Kalaallit Airports A/S-imut sinaakkutissatut piumasaqaatit aalajangersarneqarput, taamaattoq takuuk § 3, imm. 2.

Imm. 2 Kalaallit Airports A/S suliassat imm. 1-imi pineqartunut ilaasut isumaginissaannut ingerlatseqatigiiffimmik immikkoortortamik ataatsimik arlalinnilluunniit 100%-imik pigineqartumik pilersitsisinnaavoq, taamatullu Namminersorlutik Oqartussat suliassat imm. 1-imi pineqartunut ilaasut isumagineqarnissaannut ingerlatseqatigiiffinnik piginnittunik imaluunniit ingerlatseqatigiiffinnik suleqatigisanik pisariaqartunik 100%-imik pigineqartunik pilersitsisinnaapput.

Kapitali 2

Mittarfiit nutaat

§ 2. Kalaallit Airports A/S-ip Nuummi aamma Ilulissani nunani tamalaani mittarfiit, taakkununga aallartarfinnut tikittarfinnullu atortut kiisalu attaveqatigiinnermut aamma suliaqarnernut, sanaartukkanut illutanullu tassunga assingusunut aaqqissuussinerit ilanngullugit, sanassavai, pigissavai ingerlatissallugillu.

§ 3. Kalaallit Airports A/S-ip Qaqortumi nunap immikkoortuani mittarfik, tassungalu aallartarfinnut tikittarfinnullu atortut kiisalu attaveqatigiinnermut aamma suliaqarnernut, sanaartukkanut illutanullu tassunga assingusunut aaqqissuussinerit ilanngullugit, sanassavai, pigissavai ingerlatissallugillu.

Imm. 2. Suliassat imm. 1-imi pineqartunut ilaasut aammalu aningaasartuutit tassunga atasut pisortani sullissivimmut allamut imaluunniit ingerlatseqatigiiffimmut Namminersorlutik Oqartussanit pigineqartumut tunniunneqarsinnaasut, Naalakkersuisut aalajangersinnaavaat.

Kapitali 3

Mittarfiit nutaat sanaartornissaannut aningaasalersuineq

§ 4. Kalaallit Airports A/S-ip Inatsisartut inatsisaat manna naapertorlugu Nuummi aamma Ilulissani nunani tamalaani mittarfiit kiisalu Qaqortumi nunap immikkoortuani mittarfiup sanaartorneqarnerinut aningaasartuutit akilissavai, taamaattoq takuuk § 3, imm. 2. Sanaartornermut aningaasartuutit nammineerluni aningaasaatit aqputigalugit kiisalu taarsigassarsinikkut aningaasalersorneqassapput.

§ 5. Namminersorlutik Oqartussat Inatsisartut inatsisaat manna naapertorlugu Nuummi aamma Ilulissani nunani tamalaani mittarfiit sananeqarnissaannut aningaasartuutit ilaannut nammineerluni aningaasalersuinissamut kiisalu Qaqortumi nunap immikkoortuani mittarfiup tamakkiisumik nammineq aningaasalersornissaannut atugassanik aningaasanngorlugit 2,1 mia. koruunit tikillugit aktianut taarsigassarsianullu akisussaaffeqarfiusunut aningaasaliillutik Kalaallit Airports A/S-imut qulakkeerinnissapput.

Imm. 2. Naalackersuisut pisussaatinneqarput Kalaallit Airports A/S-imut avataanit attartorfiit uppersaammik allanngortinneqarsinnaanngitsumik tunissallugit, Namminersorlutik Oqartussat piginneqatigiisummik aningaasaliissuteqassasoq aamma taarsigassarsianut akisussaaffeqarfiusunut aningaasanngorlugit 2,1 mia. koruunit tikillugit aningaasaliilluni.

§ 6. Naalackersuisut Kalaallit Airports A/S-imi aktianut aningaasaatinik ataasarlutik arlaleriarlutilluunniit qaffaanissamut piginnaatinneqarput.

Imm. 2. Aningaasaatinut qaffaatissat aningaasanngorlugit 2,1 mia. koruunit tikillugit aningaasaatinut aningaasaliinissamut Naalackersuisut atsiornersigut pisinnaavoq.

Imm. 3. Tamatuma saniatigut Naalackersuisut Namminersorlutik Oqartussat Nuummi aamma Ilulissani mittarfiutaasa aallarniutitut aningaasaliinissamut atorneqarnissaannik atsiornermikkut aningaasaatinik qaffaassapput, ilanngullugit pigisat aalaakkaasut aamma teknikimut atortut taakkuluunniit ilai, kiisalu nunaminertanut pisinnaatitaaffiit taakkununga atasut.

Imm. 4. Aallarniutitut akiliuteqarnermi, takuuk imm. 3, Kalaallit Airports A/S-ip pigisani aalaakkaasuni tiguneqartuni nunami mingutsitsinerusinnaasumut, piffissaq tigusiffiusoq sioqqullugu pisimasumut, akisussaaffik tigussanngilaa. Namminersorlutik Oqartussat Kalaallit Airports A/S pisussaaffiujunnartunut aningaasartuutaajunnartunullu tamatuma malitsigisinnaasaannut pisussaatisanngilaa.

§ 7. Naalackersuisut Inatsisartut Aningaasaqarnermut Akileraartarnermullu Ataatsimiititaliaanit akuerineqarlutik piginnaatinneqarput, Kalaallit Airports A/S-imut avataanit attartorfinnut taarsigassarsianut qularnaveeqqusiinissamut, tulliullugu nunap karsianiit taarsigassarsinissamut, taakkualu Nuummi aamma Ilulissani nunani tamalaani mittarfiit aningaasalersornissaannut Kalaallit Airports A/S-imut ingerlateqqillugit taarsigassarsiaritissinnaallugit.

Kapitali 4

Mittarfinnut neqerooruteqartitsineq kiisalu atorfinitsitsinermut tunngasut

§ 8. Kalaallit Airports A/S-ip sanaartugassanut illuliassanullu Inatsisartut inatsisaanni matumani pineqartunut, nunani tamalaani neqerooruteqartitsinikkut aammalu nunani tamalaani suleriutsit naapertorlugit isertortumik neqerooruteqartitsinikkut neqeroorutinik pissarsiniarsinnaapput.

Imm. 2. Inissialiortiternermi sanaartornermilu neqeroorutinik pissarsiniartarneq pillugu Inatsisartut inatsisaat sanaartukkanut, imm. 1-imi pineqartunut, atuutissanngilaq.

§ 9. Kalaallit Airports A/S neqerooruteqartitsinermi, illuliornermi sanaartornermilu sulisut, § 8, imm. 1-imi pineqartuni illuliortiternermi sanaartornermilu suliaqarnermi sulisorineqartut aningaasarsianut atorfininnermilu atugassarititaasuni Kalaallit Nunaanni pissutsit malillugit nalinginnaasuni pineqartunut ilaatinneqassasut, piumasaqaatigissavaa.

Imm. 2. Imm. 1-imi taaneqartutut aningaasarsianik naatsorsuinermi sulisitsisup, illuliornermi sanaartornermilu sulisunik nunanit allaneersunik sulisoqartup, sulisartup nerisaqarnerata ineqarneratalu aammalu sullisaasa atisat nalingat naatsorsuinermi ilaatissinnaavai, taamaattoq annerpaamik taakkua akileraarutitigut nalingat tikillugu annertussuseqartumik.

§ 10. Illuliornermi sanaartornermilu sulisoq nunanit allaneersoq, illuliornermik sanaartornermillu suliaqarnermi sulisorineqartoq, § 8, imm. 1-imi pineqartunut ilaasoq, Kalaallit Nunaanni sulinnermit sulinngiffeqarnissamik katersissaaq. Sulinngiffeqartarneq pillugu Inatsisartut inatsisaat illuliornermi sanaartornermilu sulisunut nunanit allaneersunut, illuliornermik sanaartornermillu § 8, imm. 1-imi pineqartunut ilaasumik suliaqarnermi sulisorineqartunut, atuutinngilaq.

Imm. 2. Ukioq katersiffiusoq tassaavoq qaammatisiutit malillugit ukioq. Illuliornermi sanaartornermilu sulisoq nunanit allaneersoq qaammatisiutit malillugit ukiumi piffissamit qaammatinut 12-init sivikinnerusumik Kalaallit Nunaanni sulisimappat, ukioq katersiffiusoq taamaallaat piffissamut sivikinnerusumut tassunga tunngassuteqassaaq.

Imm. 3. Sulinngiffeqarnissamut katersorneqassapput, ukiumi katersiffiusumi nalunaaquttap akunnerinut ataasiakkaanut tamaginnut nalinginnaasumik suliffiusuni nalunaaquttap akunneri 0,096. Ukiumi katersiffiusumi sapaatip akunneranut nalunaaquttap akunnerini 40-ni nalinginnaasumik suliffeqarnermi, nalunaaquttap akunneri 200-ini sulinngiffeqarsinnaatitaanermut katersuisoqarsimassaaq. Nalunaaquttap akunnerini ikinnerusuni suliffeqarsimanermi, nalunaaquttap akunneri sulinngiffeqarfiusussat taamaaqatai katersorneqarsimassapput. Ukiumi katersiffiusumi annerpaamik nalunaaquttap akunneri 200-it sulinngiffeqarfiusussat katersorneqarsinnaapput.

Imm. 4. Nalunaaquttap akunneranut sulinngiffeqarfissatut katersorneqartunut tamaginnut sulinngiffeqarnermi ajunngitsorsiassat sulisitsisup akilissavai. Sulinngiffeqarnermi ajunngitsorsiassat nalunaaquttap akunneranut sulinngiffeqarfiusussamut ataatsimut

aningaasartalerlugit tunniunneqassapput, taanna ukiumi katersiffiusumi nalunaaquttap akunneranut suliffiusumut ataatsimut sulisup agguaqatigiissillugu aningaasarsiaatut annertussuseqassalluni.

Imm. 5. Sulinngiffeqarnermi ajunngitsorsiassat ukiup katersiffiusup naanerani tunniunneqassapput, taamaattoq kingusinnerpaamik soraarnermi aallarnermut atatillugu.

§ 11. Sulisitsisup illuliornermik sanaartornermillu suliaqarnermi illuliornermi sanaartornermilu sulisunik nunanit allaneersunik § 8, imm. 1-imi pineqartunut ilaasunik sulisoqartup isumaqatigiissummi makkuninnga pisussaaffeqarnissaa, Kalaallit Airports A/S-ip qulakkiissavaa:

- 1) Sulitilluni ajoqusernissamut sillimmasiissummut aamma inuussutissarsiorluni napparsimalernissamut sillimmasiissummut inatsimmi pisussaaffiliussamut sillimmasiisimanissaa aningaasartuutinillu akiliinissaa. Sulisitsisup sillimmasiissummut sillimmasiinissamut aningaasartuutinillu akiliinissamut pisussaaffeqarnera, atorfinitsitsinermi isumaqatigiissummi allassimassaaq.
- 2) Illuliornermi sanaartornermilu sulisunik nunanit allaneersunik napparsimasunik ajoqusermasunillu aallarussinissamut, assartuussinissamut katsorsaanissamullu aningaasartuutit akilernissaannut isumannaallisaatitut sillimmasiissummut sillimmasiinissaaq aningaasartuutinillu akiliinissaaq. Sulisitsisup sillimmasiissummut sillimmasiinissamut aningaasartuutinillu akiliinissamut pisussaaffeqarnera, atorfinitsitsinermi isumaqatigiissummi allassimassaaq.
- 3) Illuliornermik sanaartornermillu suliaqarnerit aallartinneqarnissaat sioqqullugu peqqinnissaqarfimmit sullinneqarnissap tamatumunngalu akiliutissap annertussusissaanut tunngatillugu Peqqissutsimut Naalakkersuisoqarfimmut isumaqatigiissuteqarneq.
- 4) Piumasaqaatinut Kalaallit Nunaanni peqqinnissamut oqartussanit aalajangersagaasunut naapertuuttumik illuliornermi sanaartornernilu sulisut nunanit allaneersut peqqissusaasa misissornerqarnerisa misissoqqissaarneqarnerisalu ingerlanneqarnerat.
- 5) Illuliornermi sanaartornermilu sulisut nunanit allaneersut, § 8, imm. 1-imi pineqartuni illuliornermik sanaartornermillu suliaqarnermi sulisorineqarunnaarpata, Kalaallit Nunaannit aallarnissaasa qulakkeernissaa taakkununngalu aningaasartuutini akiliinissaaq.
- 6) Peqqinnissamut ilinniarsimasunik sullivinni imaluunniit sulliviup eqqaaniittoqarnissaa qulakkeerlugu, tassani napparsimanermi ajoqusernermilu peqqinnissaqarfimmit naammattumik naleqquttumillu sullinneqarnissaaq qulakkeerneqassalluni.

Imm. 2. Naalakkersuisut illuliornermi sanaartornernilu sulisut nunanit allaneersut peqqissusaannut, ilanngullugu misissorneqartarnerinut uppersaasiisarnerinullu, maleruagassanik aalajangersaasinnaapput.

§ 12. Illuliornermi sanaartornermilu sulisut nunanit allaneersut paasineqassapput tassaasut, sulisartoq kinaluunniit piumasaqaatinik makkuninnga naammassinissimasoq:

- 1) sulisartoq sulinermini nalinginnaasumik Kalaallit Nunaata avataani sulisartoq,
- 2) sulisartoq § 8, imm. 1-imi pineqartuni illuliornermik sanaartornermillu suliaqarnermi sulisussatut piffissami aalajangersimasumi Kalaallit Nunaanni sulisorineqartoq aamma

3) sulisartog tamanna pillugu entreprenørimut imaluunniit taassuma ataani pilersuisumut isumaqatigiissut naapertorlugu nr. 2 naapertorlugu suliaqarnermi sulisorineqartoq.

§ 13. Soraarnerussutisianut pinngitsoorani aaqqissuussineq pillugu Inatsisartut inatsisaat illuliornerni sanaartornernilu sulisunut nunanit allaneersunut, § 8, imm. 1-imi pineqartuni illuliornermik sanaartornermillu suliaqarnermi sulisorineqartunut, atuutinngilaq.

Kapitali 5

Kalaallit Airports A/S-ip suliaqarnera

§ 14. Kalaallit Airports A/S-ip ingerlatseqatigiiffimmut maleruaqqusat naapertorlugit suliaqarnini ingerlatissavaa. Ingerlatseqatigiiffiup suliaqarnera tamarmiusoq niuernermik tunngaveqartumik ingerlanneqassaaq.

Imm. 2. Kalaallit Airports A/S-ip niuerfiusut imaluunniit atuuffiit allamut suliakkiutigisinnaavai.

§ 15. Kalaallit Airports A/S ingerlatseqatigiiffiup mittarfiini atorneqarnerinut akinik aalajangersaasassaaq.

Imm. 2. Ingerlatseqatigiiffiup mittarfiinut akit akinullu tunngaviusut Kalaallit Airports A/S-ip suliai tamarmiusut tunngavigalugit aammalu § 14-imi tunngavissat naapertorlugit aalajangersarneqartassapput.

Imm. 3. Ingerlatseqatigiiffiup mittarfiinut akit akinullu tunngaviusut, kiisalu taakkununga allannguutissat Naalakkersuisunit akuerineqartassapput.

Kapitali 6

Sanaartorfissagissaaneq nunalu tamakkerlugu pilersaarusiortarnermut malittarisassat

§ 16. Nuummi aamma Ilulissani nunani tamalaani mittarfinnik kiisalu Qaqortumi nunap immikkoortuani mittarfimmik Inatsisartut inatsisaat manna naapertorlugu sanaartornermut atatillugu, pisortanit ingerlanneqartumik attaveqatigiinnermik pilersitsinissamik pisariaqartinneqalersunik sanaartornissamut aningaasartuutit akilerneqarnissaat pillugu Naalakkersuisut kommuninut isumaqatigiissusiorsinnaassapput.

Imm. 2. Attaveqarnermi pisortanit ingerlanneqartuni annertuunik Nuummi, Ilulissani aamma Qaqortumi mittarfinnik Inatsisartut inatsisaat manna naapertorlugu sananermut ilaatillugu ajoquserneqartuni imaluunniit pisariaqartinneqalersuni, pilersitseqqinnissamut allanngortitsinissamullu aningaasartuutit agguarneqarnissaat pillugu Naalakkersuisut Kalaallit Airport A/S-imut isumaqatigiissusiorsinnaapput.

§ 17. Naalakkersuisut nuna tamakkerlugu pilersaarusiornissamut malittarisassani Inatsisartut inatsisaat manna naapertorlugu Nuummi, Ilulissani Qaqortumilu mittarfinnik,

taakkunanilu aallartarfiit tikittarfinnullu atortut aamma attaveqaqatigiinnermut aaqqissuussinerit ilanngullugit, tamatumalu kingunerisaanik pisortanit ingerlanneqartumik attaveqaqatigiinnermik pilersitsineq sanaartornermut maleruagassanik sukumiisunik aalajangersaasinnaapput.

Imm. 2. Naalackersuisut nuna tamakkerlugu pilersarusiornermi sumiiffiit ilaannik, Inatsisartut inatsisaat manna naapertorlugu Nuummi, Ilulissani Qaqortumilu mittarfinnik, taakkunanilu attuumassuteqartunik aallartarfiit tikittarfinnullu atortut aamma attaveqaqatigiinnermut aaqqissuussinerit ilanngullugit, aammalu pisortanit ingerlanneqartumik attaveqaqatigiinnermik pilersitsineq, taakkulu kingunerisaanik atuinnermut aalajangersakkat sukumiisut kommunimi pilersaarutit inatsisitigut sunniuteqassanersut aalajangersinnaavaat.

Kapitali 7

Pinngitsaaliissummik taarsiissutitalimmik arsaarinninnissaq

§ 18. Naalackersuisut Nuummi, Ilulissani Qaqortumilu mittarfiit, taakkulu aallartarfiinut tikittarfinnullu atortut aamma attaveqaqatigiinnermut aaqqissuussinerit ilanngullugit illuliortiternerit sanaartornerillu, kiisalu tamatuma kingunerisaanik pisortanit ingerlanneqartumik attaveqaqatigiinnermik pilersitsinnermut atatillugu, pisariaqartillugu pigisanik aalaakkaasunik pinngitsaaliissummik taarsiissutitalimmik arsaarinninnissaq. Pinngitsaaliissummik taarsiissutitalimmik arsaarinninneq, pinngitsaaliissummik taarsiissutitalimmik arsaarinnittarnerit pillugit Inatsisartut inatsisaanni maleruagassat malinneqassapput.

Kapitali 8

Nassiussanik imaatigut assartuussineq

§ 19. Inatsisartut inatsisaanni sanaartugassat illuliortiternissallu pineqartut suliarineqarnissaannut atortussanik imaatigut nassiussanik assartuinnermi Kalaallit Nunaannut, Kalaallit Nunaanniit aamma Kalaallit Nunaanni nassiussanik imaatigut assartuisarneq pillugu Inatsisartut peqqussutaat atorineqassanngilaq.

Kapitali 9

Pisortanut naqissusiinnermut akitsuut

§ 20. Allagaatinut, taarsigassarsinnermut uppersaatinut, allagaatit naqinnerinut uppersaatinullu il.il., sanaartornermut illuliortiternernullu atatillugu suliarineqartunut, Inatsisartut inatsisaannut matumunnga ilaatinneqartunut pisortanut naqissusiinnermut akitsuusiisoqassanngilaq.

Imm. 2. Naqissusiisussaanginnermut aamma allagaatit taarsigassarsinermullu uppersaartit il.il. Kalaallit Airports A/S-imut pigisanik nalilinnik, § 6, imm. 3-mi pineqartunik aallarniutitut akiliutigineqartut tunineqartulluunniit tunniunneqarnerinut atatillugu suliarineqartut ilaatinneqarput.

Kapitali 10

Atuuttussanngortitsineq

§ 21. Inatsisartut inatsisaat manna xx. xxx 2018-imi atuutilerpoq.

Namminersorlutik Oqartussat, ulloq xx. xxx 2018

Kim Kielsen